

Gwerz Santez Paol

TON : *Gwerz kos sant Erwan.*

DISKAN

Santez Paol, patronez karet,
Eus lein an nenv hon sikouret.

1

Kristenien a Baol, me ho ped,
Bras ha bihan, deut da glevet
Displega buhe ar Santez
A zo d'ho parrez patronez.

2

Santez Paol a deuas er bed
En Rom, kreiz an drivet kantved ;
Gant he mamm savet er gwir Fe,
Abred ar verc'h a gar Doue.

3

Endro d'ezi aour, enoriou,
Gened, brud-vat ha skianchou...
Pa deu en oad da gât pried,
Toxatus hi deus dibabet.

4

Bugale fur hag eurusted
Laouennas ti an daou bried ;
Met an eurusted a dremen
Er bed-man 'vel eul luc'heden.

5

Toxatus, gant ar marv skoet,
 Lez e di er' glac'har beuzet :
 An intanvez na gav dizoan
 Nemed er bedenn eus he foan.

6

Bremañ Paol ranno he buhe
 'Tre Doue hag he bugale :
 Eul leandi vo he falez
 Hag hi vévo en leanez.

7

Eur manac'h brudet, sant Jerôm
 Eus broiou Sav-Heol deut da Rom,
 He reno er vuhe gristen
 Gant ar Skritur hag ar bedenn.

8

He bugale hag ar baourien,
 Ar Skritur sakr, ar binijenn :
 Setu he buhe hed ha hed,
 Laret ganti keno d'ar bed.

9

Met c'hoant he c'halon zo gwelet
 Ha bevan er vro 'n eus bevet
 Enni he Salver, he aotro,
 Evit-se ar mor a dreuzo.

10

'Tre he bugale en daerou
 He deus rannet he holl madou,
 Laret keno d'an Itali
 'Vit douara en Seleusi.

11

Treuzet mor, redet an douar,
 Daoulinet war Vene Kalvar,

Gwelet ganti Jerusalem,
Mont ra goude da Vetlehem.

12

Eno 'savo he leandi,
'Vit he gwerc'hezed, eviti,
Kelenet c'hoaz gant Sant Jeròm
Oa benn neuze distro eus Rom.

13

Ar bedenn hag ar binijenn
A yuniou hag an aluzenn,
Lenn ar Skritur, ober studi
Eo holl labour al leandi.

14

'Vit he leanezed doujus
Paol zo eur vamm garantezus ;
Ar gentan er labour, er boan,
Hep damant 'viti he unan.

15

Sikour a ra an Ilizou,
Nerza Jeròm 'n e labouriou :
'Vit difenn Doue hag ar Fe
Ec'h eo prest da rei he buhe.

16

Mét skoet eo gant ar c'hlenved
Ha Paol war ar plouz astennet,
'Vel pa welje Jezuz, a lar :
« Echu 'viton poan an douar.

17

« Me glev Jezuz o laret d'in :
« Savet, ma c'houlmig, deut ganin ;
« Krog 'vitoc'h an neve-amzer,
« Savet ha deut gant ho Salver. »

Neuze, 'n eur mouse'hoarz dudius,
 Hi ro hec'h ine da Jezuz ;
 Er blos pevar c'hant ha pevar
 He deus kwitaet an douar.

Eskibien ar Vro dastumet.
 He doug d'an douar benniget,
 Endro d'e menec'h, beleien,
 Eur bobl a dud hag a baourien.

Hirie he c'horf a zo en Frans,
 En Iliz-veur eskohti Sans ;
 Met santez Paol a zo brudet
 Dre ar bed holl, hag enoret.

Hon zud Kos 'boa meur a vloavez
 He c'hemeras da Batronez ;
 A boa pell-zo en parrez Paol,
 Ec'h eo enoret gant an holl.

Santez Paol, hon Fatronez vat,
 Goulenet evidomp peb mad ;
 Graet ma heuilfomp ho vertuou
 Evit mont eun de d'an nenvou.

D. S. — Pardon Santez Paol a ve graet en Paol, bep blos
 ar 4st sul a viz eost.

Imprimatur :

Brioci, die 5a Septembbris 1933.

EUG. LE BELLEC *v. g.*